

Disgrazchè al Piz Linard

Pulizia chantunala In dumengia avantmezdi es disgrazchada ün'alpinista al Piz Linard sur Lavin. La duonna da 44 ons d'eira in viadi cun seis partenari vers il piz. La bunura d'eiran els partits da la Chamonna Linard. Cuort avant il piz, sül spi südost sün ün'otezza da 3300 m s.m., es la duonna lura però crodada var 200 meters illa pro-

fuondità, sco cha la Pulizia chantunala scriva in üna comunicaziun.

Il salvamaint da la Rega ha be amo pudü chattar morta l'alpinista. Seis partenari nun es gnü ferì ed ha tschüf sustegn dal Care-Team Grischun. Insebel culla procura publica examinescha la Pulizia chantunala co cha quist accidaint mortal ha pudü capitar. (cdm/rtr/fmr)

Arrandschamaints

Linard Bardill prelegia a Valchava

Chasa Jaura Linard Bardill preschainta seis nouv cudesch da poesias «Terra pels peis – Den Füssen ein Grund» illa Chasa Jaura a Valchava. In quistas poesias giouva el cun tuot ils elemaints: la terra, l'ajer, la natüra, il temp ed il spazi. L'autur lascha relantar e drizza seis sguard sün l'essenzial. E perquai cha Linard Bardill es adüna eir ün grond narratur e chantautur, raquinta sia lingua istor-

gias, s-chaffischa purtrets ed es ludica e famigliara. Per l'accompagnamaint musical es Linard Bardill naturalmaing eir d'udir in original. La prelecziun cun musica in rumantsch e tudais-ch illa Chasa Jaura a Valchava ha lö in gövgia, ils 21 settember, a las 20.30. I vain organisà eir üna maisa da cudeschs da la chasa editura rumantscha ed ün aperitiv. (protr.)

Concert classic a San Niclà

San Niclà Il Center cultural Baselgia San Niclà invida in venderdi, als 22 settember ad ün concert classic romantic cul duo Claudia Augusta. Pasquale Bonfitto (clavazin) e Matteo Bodini (cello) derivan dal Vnuost. Els sunan tocs per e-piano e cello ed accumpognan al pu-

blic sün ün viadi musical da Bach fin Pärt. Il concert cumainza a las 20.15 illa Baselgia San Niclà. Sco finischun offra la società ün aperitiv. (protr.)

Reservaziun, tel. 081 864 08 89 / 076 343 63 51.

Terz Poetry Slam Engiadinais

Samedan L'uniun dals Grischs invida al Terz Poetry Slam Engiadinais. Quel ho lö als 22 settember in Chesa Planta a Samedan. Modereda vain la saireda da Romana Ganzoni. La bar es avierta a partir da las 19.30 ed a las 20.00 cumainza il slam. Poetry slams sun occurrenz, inua cha persunas prelegian lur

texts ad ün public. Ils texts paun esser poesias, istorgias, que po dafatta ir in direcziun da «rap. Minchün ho be ses minuts per sia performance. Il public decida chi chi guadagna e quella persuna survain üna butiglia iva. (protr.)

Infuormaziuns: www.udg.ch.

Exposiziun in regordanza da Otmar Derungs

Ftan L'artist engiadinais Otmar Derungs es mort la mità da mai a Strada. In algordanza a sia lavur artistica organiseschan ils fradgliuns ün'exposiziun dals 29 settember fin als 19 october i'l Hotel Bellavista a Ftan. Preschantats vegnan üna tschinquantina da purtrets cha l'artist barmör vaiva deposità in sia

chasa a Strada. Da verer sun eir ouvras plü veglias cha Otmar Derungs vaiva pitturà sco giuvnot d'urant il temp ch'el vivaiva a Turich. La vernissascha da l'exposiziun in memoria ad Otmar Derungs ha lö in venderdi, ils 29 settember, da las 18.00 a las 21.00 i'l Hotel Bellavista a Ftan. (protr.)



Xiaoming Wang es il solist culla già da l'orchester chi preschainta las quatter stagiuns da Vivaldi illa Baselgia da Scuol.

fotografia: Patrick Gutenberg

Stradivari cun quatter stagiuns musicalas

Dals 25 als 28 settember ha lö la festa da Stradivari in Engiadina Bassa. D'urant quatter dis han lö quatter concerts a Sent, Ardez, Scuol e Tarasp. Il punct culminant saran las quatter stagiuns da Vivaldi in marcurdi illa Baselgia da Scuol.

NICOLO BASS

Eir quist on ha lö la festa da Stradivari in Engiadina Bassa. Dals 25 fina ls 28 settember spordscha il Quartet Stradivari insebel cun otras musicantas e musicants ün giordimaint musical da buna qualità illas müraglias istoricas intuorn Scuol. Ils organisatuors impromettan ün evenimaint musical per tuot ils sens, il program es multifari: In lündeschi, ils 25 settember preschainta il Quartet Stradivari ün concert cun quartets per instrumaints a corda da Mozart. Il con-

cert in mardi, ils 26 settember illa Baselgia ad Ardez es dedichà a Dvorak. Il punct culminant sarà quist on il concert cullas quatter stagiuns da Vivaldi cun ün orchester da strichaders e cembalo, in marcurdi, ils 27 settember, illa Baselgia da Scuol. La finischun da la festa da Stradivari ha lö in gövgia, ils 28 settember cun ün concert da melodias da tango per violina e violoncello i'l Chastè da Tarasp. Per quist concert nu daja plü ingüinas plazzas libras.

Colliar il cling da la già culla natüra Il solist pro las quatter stagiuns da Vivaldi es Xiaoming Wang. Per el es mincha stagiun da Vivaldi extraordinaria ed el ama l'ouvra da cumposiziun. El es adüna darcheu fascinà dal renom da la musica da Vivaldi. «Minchün es bun da's identifichar cullas quatter stagiuns e minchün collia emozions, sentimaints ed istorgias cullas stagiuns. Cullas melodias dad Antonio Vivaldi vegnan quistas algordanzas rinforzadas e michün as sainta bain», quinta il solist.

El persunalmaing ama la stagiun da prümavaira: «La prümavaira maina nouv'energia, la natüra svaglia, l'ajer es frais-ch e las fluors creschan e preschaintan lur culuors.» Cun quistas emozions prouva el eir da far musica. Uschè prova'l da colliar il cling da la già cun l'imaginaziun da la natüra.

Eir üna festa culinaria

La festa da Stradivari nu metta be pais sülla musica, dimpersè promouva eir il contact culs auditors preschaints. Uschè ha lö davo mincha concert ün aperitiv pels giasts e musicants. E chi chi vuol approfondir ils discurs, ha la pussibilità da tour part al program culinarian insebel cullas musicantas ed ils musicants.

Program: lündeschi, 25 settember, 17.00, concert Baselgia Sent; mardi, 26 settember, 17.00, concert Baselgia Ardez; marcurdi, 27 settember, 17.00, concert Baselgia Scuol; gövgia, 28 settember, 17.00, concert Chastè da Tarasp. Daplü infuormaziuns sün www.stradivarifest.com

Forum da votumaziun

ScuolSolar – Duos jadas schi, per pudair decider finalmaing, schi's vuol realisar ün implant o na

Il cumün politic da Scuol decida la fin d'eivna, sch'el vuol dar glüm verda, per chi possa gnir inoltrada la dumonda da fabrica per l'implant fotovoltaic a Sur Bos-cha. Be cun duos jadas schi pon gnir continuadas las lavuors per elavurar la basa, per trar üna decisiun democratica, a man da cifras verificadas sco eir a man d'ün preventiv da cuosts.

Las Ouvras Electricas da l'Engiadina (OEE), han scleri cul cumün politic, a regard la pussibilità, da realisar ün implant fotovoltaic in Sur Bos-cha. In üna radunanza cumünai vla dal cumün da vaschins sco eir dal cumün politic, han ils respunsabels davart las OEE spiegà la motivaziun per realisar ün tal implant sù Sur Bos-cha. Il perimenter calculà importaiva ca. 50 ha (0.5 km²), la prestaziun dal implant previs, d'eira 60 – 100 MW e la producziun annuala vaivan stimà cun 80 – 120 GWh.

Cun las cugnuschentschas actualas a regard la protecziun da la cuntrada, ingünas fuormas geometricas (trianguls, rectanguls e.u.i.), in resguardond il rapport davart la cumpatibilità davart l'ambiant (excluder zonas cun palüds e

prada secha) sco eir pervi da motivs technics (augmentar la distanza in lös cun paca pendenza), esa be pussibel da realisar ün implant cun üna prestaziun maximala da 40 MW. Sper tuot ils avantags, reducziun da la visibilità, daplü spazi per pascular eir in avegnir il perimenter da l'implant, ha stuvü gnir ingrondi il perimenter cuvernà cun indrizs solars sün ca. 77 ha.

Avant co cumanzar a dar aint la prüma guotta per l'implant fotovoltaic da Sur Bos-cha, esa da survgnir il permis da fabrica e d'avair fundà la società d'acziun chi fa las investiziuns necessarias. Be scha tuot ils partenaris da tala, il cumün politic da Scuol, l'EE Energia Engiadina e las Ouvras Electricas d'Engiadina SA decidan da's participar e da fundar la nouva società d'acziun po gnir realisà l'implant. Per decider a man da fats esa il prüma da savair quant cha ün tal implant cuosta e cun che entradas chi's po quintar. Schi füss uschè simpel, sco cha blers fan verer, e sainza necessità per cuvernar la mancanza d'energia impustüt l'inviern, nu vess deliberà il parlamaint ün credit d'urgenza da 3,4

milliards francs per subvenziunar implants fotovoltaics cun üna ota producziun d'energia electrica eir l'inviern.

Eu sun persvasischem, cha la fuorma da partenari (sainza ün partenari da la bassa cun majorità) sco eir l'indemnisaziun per kWh es optimala. Eir schi's po stimar la producziun d'implants solars in cuorta vista dret bain, nun es il predscha dal marchè congrua-label cun la producziun d'ouvras d'aua cun lais d'accumulaziun. Ils cumüns concessionaris da las OEE han concess illa concessiun ün rebass da descha pertschient dal fit d'aua maximal e survignan 1.1 rp/ukW. Scha l'implant previs cun 40 MW prodüa energia pel predscha da vendita (ingün guadogn, «Ebit» = 0 francs) importa il fit pel terrain l'on da media 60 uGW jadas 0.75 rp/ukW = 450000 francs. Pro ons cun perditas as po redüer quist import be sün minimalmaing 375000 francs. Pro ons cun guadogn s'augmanta l'import continuadamaing fina ch'el ragiundscha il maximum da 900000 francs. (1.5 rp/ukW) e stagna pro quel

import cun ün guadogn plü ot. Eu nu cugnusch ingün contrat chi prevezza ün fit pel terrain, da 1.5 rp/ukW. Investiziuns essenzialas vegnan fattas be pro la fabrica da l'implant e davo ca. 25 fin 30 ons da gestiun, cur chi gnaran rimplazzats ils moduls e las ulteriuras parts electronicas (ca. 1/3 da l'investiziun). Grazcha a las subvenziuns ed il fat, cha'ls cuosts per fits as redüan on per on cun mincha amortisaziun e listess mumaint crescharà il predscha da vendita (incharimaint) nun es la dumonda scha quists implants rendan, dimpersè unica-maing cur cha quels rendaran. Illa Südostschweiz dals 18.09.2023 as poja leger, cha pro l'implant da Magriel a Mustèr (AXPO 60 pertschient, cumün 40 pertschient), importa l'indemnisaziun pro üna producziun da 17 uGW = 100000 francs respectivamaing 353000 francs pro 60 uGW (pro guadogns o scha'l quint es egualisà) e 40000 francs respectivamaing 141000 francs pro 60 uGW (pro perditas). Pro'l segund implant a Mustèr paja la IWB, Basel (100 pertschient), ün rap

pro ukW. Al cumanzamaint po esser quist import fix ün pa plü ot, però pro ün guadogn da 0.5 ukW es il fit dal terrain istess ot e'l cumün da Scuol as partecipescha eir amo vi dal guadogn. Causa cha la società d'alp es in mans privats sto il cumün il prüma s'abinar cun tala, per surgnir 1/3 dal rap surmanzunà. Riassunt, pro üna producziun da tuots duos implants ün pain plü ota (62 uGW) es l'indemnisaziun maximala 250000 francs (Scuol max. 900000 francs) e pro ün quint cun perdita be 190000 francs (Scuol minimum 375000 francs).

Tenor mai füssa puchà scha nu pudessan cuntinuar culs sclerimaints, per pudair preschantar cuosts verificats chi permettian da trar üna decisiun democratica as basond sün fats. Quai es be pussibel scha eir Ellas/Els dan glüm verda, per cuntinuar cun las lavuors preparatoricas e vuschan cun persvasiun duos jadas «schi» in merit.

Walter Bernegger
Committer da la cumischion tecnica da ScuolSolar